

N A Q Q I I S S U T

Akissuteqaammut 4. oktober 2012-imeersumut taartaasusaaq
(Immikkoortoq siulleq iluarsineqarpoq)

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12, 19. november 2007-imeersup kingusinnerpaamik UPA 2013-imi allangortinneqarnissaanik, Naalakkersuisut peqquneqarnissaanik aalajangiiffigisassatut siunnersuut. Taamaaliornikkut inissiap attartukkap pisiarissallugu kissaatigineqartup akia niuernerme akigititaasut tunngaviginagit, taamaallaat teknikkut aningaasatigullu inissiap akia naapertorlugu aalajangersarneqartalersillugu.

(Inatsisartunut ilaasortat Malik Berthelsen aamma Kim Kielsen, Siumut)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Inatsisartuni ilaasortat Malik Berthelsen aamma Kim Kielsen attartortumiit piginnittumut aaqqissuussineq allangortillugu akinut ullumikkutut niuernerme akigititaasut tunngaviginagit, teknikkimut aningaasaqarnernullu naligititaasut tunngavigineqartalernissaannik siunnersuuteqarnerannut qutsavigaakka.

Kialuunniit inissiami najukkamini nammineerluni pigisaqarnissamut periarfissaqartup tamatumunnga periarfissinneqarnissaa Naalakkersuisut kissaatigimmassuk ilumoorpoq. Taamaattumillu aamma Kalaallit Nunaat tamakkerlugu attartortut tamarmik inissiamik attartukkaminik pisinissamut periarfissaqarnissaat kissaatiginarpoq.

Attartortumiit piginnittumut aaqqissuussaaq maannakkut atuuttoq UKA 2007-imi akuerineqarpoq aammalu ulloq 1. januar 2008 atuutilerluni. Aaqqissuussap kingunerisaanik attartortut inissiap attartugartik niuernermet nalinganut pisiarisinnaalerpaat. Tamatuma siornatigut aaqqissuussaaq 2002-imeersoq atuuppoq, attartortut inigisartik tunngaviusumik teknikkikkut aningaasaqarnikkullu nalinganut pisiarisinnaagaat tunngaviulluni.

Teknikkikkut aningaasaqarnikkullu naliusoq malillugu pisinermut assersuuteqalaariarlanga.

Illu 1,5 mio. koruuninut niuernermet nalilerneqarsimappat aammalu teknikkikkut aningaasaqarnikkullu nalinga 730.000 koruuniulluni, 770.000 koruuninut aningaasat nikingassutaannut qularnaveeqqusiussaaq suliarineqassaaq, taannalu ukiuni qulini nalikilliartuaartinneqassalluni.

Teknikkikkut aningaasaqarnikkullu nalinganit 730.000 koruuniusumit pisisoq taamaallaat 60 %-imik akiliuteqassaaq, tassalu 438.000 koruunit missaannik. Aningaasat sinneri 292.000

koruunit missaanniittut ukiuni 15-ini pisortanit erniaqanngitsumik taarsersugassaangitsumillu taarsigassarsiaritineqassapput.

Matuma siuliani assersuutip takutippaa illu 1,5 mio. koruuninik niuernermit nalilerneqartoq, taamaallaat maannakkorpiaq 438.000 koruunit missaannik Namminersorlutik Oqartussanit pissarsiffigineqartussaasoq.

Attartortumiit piginnittumut aaqqissuussineq malillugu tunisinerit teknikkikkut aningaasaqarnikkullu nalinganik tunngaveqartut, namminersorlutik inissiaatillit ineqarnermut niuerfianni pitsaanngitsup tungaanut sunnuteqarsinnaasussaapput aammalu assersuutigalugu Nuummi namminersorlutik inissiaatillit inissiaataasa akeqartinneqarneranni allanngorartitsinnaallutik. Tamatuma aamma kingunerisaanik, pisortat taamaaqataannik akikinnerujussuarmik akiliisitsillutik neqerooruteqartassappata, innuttaasut inigisaminnik niuernermit akiusoq malillugu pisisimasut inigisamik tuninissaa ajornakusoortittorujussuannngortussaavaat.

Illoqarfinni minnerusuni aammalu nunaqarfinni isorliunerusunilu, inissiat niuernermit naligat teknikkikkut aningaasaqarnikkullu naliusumit appasinnerusarmat, siunnersuut akuerineqassappat, inissiap attartukkat pisiarinissaa pilerinaateqartussaangilaq. Assersuutigalugu takorloorneqarsinnaavoq sumiiffinni inissiap teknikkikkut aningaasaqarnikkullu nalinga 1,5 mio. koruuniusoq aammalu niuernermit nalinga millionit affaanit annikinnerulluni.

Inissiat attartukkat tamatigut niuernermit akit tunngavigalugit naliliinikkut tiguneqarsinnaalerlugit peqqussut 2007-imi akuerineqarmat, illoqarfinni pineqartumi inissianik niueruteqarnermit kiffaangissuseqartumik akeqartitsinerit, tassa imaappoq inissianik pisiassaarneq aammalu piumannineq, kisimik akiusumut aalajangiisussanngorput. Taamaattumik tamatuma kingunerisaanik niueruteqarnermit akeqartitsinerit sunnuteqarfigineqartussaajunnaarput, niuernermit pissutsit kiffaangissuseqartumik illoqarfinni pineqartumi tunisinermit akinut aalajangiisussaammata. Tamatuma ingerlatiinnarneqarnissaa Naalakkersuisut kissaatigaat.

Naalakkersuisut taamatut oqaaseqarlutik aalajangiiffigisassatut siunnersuut akuersaangilaat.